



**PARLAMENTARNA SKUPŠTINA
BOSNE I HERCEGOVINE**

201

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na 77. sjednici Predstavničkog doma, održanoj 13. aprila 2006. godine, i na 57. sjednici Doma naroda, održanoj 13. aprila 2006. godine, usvojila je

ZAKON

**O IZMIRENJU OBAVEZA PO OSNOVU RAČUNA
STARE DEVIZNE ŠTEDNJE**

DIO PRVI - OPĆE ODREDBE

Član 1.

(Predmet Zakona)

- (1) Ovim Zakonom uređuju se postupak, način i rokovi izmirenja obaveza Bosne i Hercegovine po osnovu računa stare devizne štednje deponirane u domaćim bankama na teritoriji Bosne i Hercegovine.
- (2) Za izmirenje obaveza po osnovu računa stare devizne štednje odgovorna je Bosna i Hercegovina, a sredstva osiguravaju Federacija Bosne i Hercegovine, Republika Srpska (u daljnjem tekstu: entiteti) i Brčko Distrikt Bosne i Hercegovine (u daljnjem tekstu: Distrikt).
- (3) Osiguranje sredstava u skladu sa stavom (2) ovog člana zasniva se na lokaciji svakog depozita u banci ili njenim filijalama ili najnižim operativnim jedinicama koje su poslovale na teritoriji entiteta i Distrikta u kojima je deponirana devizna štednja.
- (4) Obaveza vraćanja duga s deviznih računa i deviznih štednih uloga, iz stava (1) ovog člana, zaključenih s bankama čije je sjedište bilo van teritorije Bosne i Hercegovine, prema Sporazumu o sukcesiji, obaveza je države, sljednice bivše

SFRJ, na čijoj teritoriji se nalazilo sjedište te banke. Bosna i Hercegovina obavezuje se da će, kroz svoje međunarodne aktivnosti, pomoći štedišama koje imaju štednju kod ovih banaka da ostvare svoja prava, najmanje jednako kao i štediše kod banaka čije se sjedište nalazilo na teritoriji Bosne i Hercegovine.

- (5) Izmirenju obaveza Bosne i Hercegovine u smislu st. (1) i (2) ovog člana prethodi postupak verifikacije potraživanja.

Član 2.

(Definicija računa stare devizne štednje)

- (1) U smislu ovog Zakona, pod računima stare devizne štednje podrazumijevaju se devizna sredstva kod banaka na teritoriji Bosne i Hercegovine, sa stanjem na dan 31.12.1991., uključujući kamatu obračunatu do tog datuma, a umanjena za direktne isplate banke nakon tog datuma, za prenesena i iskorištena sredstva s jedinstvenog računa u Federaciji Bosne i Hercegovine i jedinstvenog privatizacijskog računa u Republici Srpskoj i Distriktu, i za eventualne isplate poslije 31.12.1991. po bilo kojem drugom osnovu.
- (2) Računi stare devizne štednje definirani stavom (1) ovog člana ne obuhvataju račune stare devizne štednje u filijalama Ljubljanske banke, Invest banke i drugih stranih banaka na teritoriji Bosne i Hercegovine.

Član 3.

(Prvobitni vlasnici i kupci certifikata i vaučera)

- (1) Na osnovu preliminarnih podataka banaka sa sjedištem u Bosni i Hercegovini, u smislu člana 2. stav (1), stanje stare devizne štednje iznosi 1.979.000.000 KM. Konačno stanje štednje utvrdit će se nakon završetka postupaka verifikacije za svakog pojedinačnog štedišu u zbirnom iznosu.
- (2) Štediše koje su trećem licu prodale certifikate po osnovu računa stare devizne štednje u Federaciji Bosne i Hercegovine ili koje su prodale vaučere po osnovu računa stare devizne štednje u Republici Srpskoj nemaju pravo podnositi zahtjev za verifikaciju u skladu s ovim Zakonom.

- (3) Kupci certifikata po osnovu računa stare devizne štednje u Federaciji Bosne i Hercegovine ili kupci vaučera po osnovu računa stare devizne štednje u Republici Srpskoj i Distriktu navedene certifikate ili vaučere mogu koristiti samo u procesu privatizacije i nemaju pravo podnositi zahtjev za verifikaciju u skladu s ovim Zakonom.

Član 4.

(Obračun kamate)

Obračunata i neisplaćena kamata prema ugovorima iz člana 1. stav (1) nakon 1.1.1992. godine se stornira i od istog datuma, pa do stupanja na snagu ovog Zakona, vrši se novi obračun kamata po stopi od 0,5%.

DIO DRUGI - VERIFIKACIJA

POGLAVLJE I. OPĆI PRINCIPI

Član 5.

(Opći principi)

Obaveze po osnovu računa stare devizne štednje koje nisu verificirane u skladu s odredbama ovog Zakona i provedbenim propisima entiteta i Distrikta mogu se dokazivati i ostvarivati samo u sudskom postupku.

Član 6.

(Verifikacija potraživanja)

- (1) Verifikacija predstavlja neophodan postupak kojim se identificiraju potražioc, vrši provjera iznosa računa stare devizne štednje svakog potražioca i registriraju sva potraživanja po osnovu računa stare devizne štednje, čime se potvrđuju a ne redefinišu i ne raskidaju postojeća prava.
- (2) Nakon završetka verifikacije, potražilac dobiva potvrdu o verifikaciji koja identifikira potražioca i verificira iznos računa stare devizne štednje.
- (3) Potvrda iz stava (2) ovog člana predstavlja osnovu za izmirenje potraživanja po osnovu računa stare devizne štednje i izdaje se u obliku formulara koje propisuju entiteti i Distrikt, a uključuje i sljedeće:
 - a) svaki pojedinačni račun i verificirani iznos;
 - b) identitet vlasnika;
 - c) izjavu o odustajanju od tužbe nakon što potražilac primi gotovinsku isplatu; i
 - d) naziv banke i broj računa na koji će biti izvršena gotovinska isplata i isplate po osnovu emitiranih obveznica iz člana 18. ovog Zakona.
- (4) Ako potražilac raspolaže s više računa, svi računi pojedinačno se verificiraju i iznosi sabiraju radi izračunavanja gotovinskih isplata i iznosa obveznica koje se emitiraju prema ovom Zakonu. Svaki pojedinačni potražilac dobiva samo jednu potvrdu o verifikaciji.
- (5) Verifikacija stanja deviznog uloga za svakog štedišu izvršit će se kumulativno za položenu štednju u jednoj ili više banaka koje su imale sjedište na teritoriji entiteta i Distrikta.

Član 7.

(Agencije za verifikaciju)

- (1) Verifikaciju računa stare devizne štednje, u skladu s odlukama entitetskih vlada i Skupštine Distrikta, vršit će:
 - a) Agencija za posredničke, informatičke i finansijske usluge A.D. Banja Luka - za Distrikt;
 - b) Agencija za posredničke, informatičke i finansijske usluge A.D. Banja Luka - za Republiku Srpsku;
 - c) Agencija za finansijske, informatičke i posredničke usluge D.D. Sarajevo - za Federaciju Bosne i Hercegovine; i

- d) Agencija za pružanje finansijskih, informatičkih i posredničkih usluga Mostar - za Federaciju Bosne i Hercegovine (u daljnjem tekstu: Agencije).

- (2) U roku od 15 dana od dana stupanja na snagu ovog Zakona, Agencije će razmijeniti baze podataka za sve depozite po osnovu računa stare devizne štednje, čija se izmirenja, u skladu s ovim Zakonom, vrše u drugom entitetu ili Distriktu.

Član 8.

(Obaveze banaka)

- (1) U postupku verifikacije računa stare devizne štednje banke su obavezne saradivati s entitetskim ministarstvima finansija, Upravom prihoda Distrikta, Agencijama i komisijama.
- (2) U postupku verifikacije banke su obavezne svoje baze podataka provjeriti i učiniti ih dostupnim Agencijama za postupak verifikacije i pripremiti dva posebna iskaza upisane kamate koja se odnose na period do 31.12.1991. i period nakon 31.12.1991. godine.

Član 9.

(Javni poziv)

- (1) Kao dio postupka verifikacije računa stare devizne štednje, entitetska ministarstva finansija i Uprava prihoda Distrikta objavit će poziv za verifikaciju računa stare devizne štednje u najmanje dva dnevna lista dostupna na cijeloj teritoriji Bosne i Hercegovine, i na internetu, i to najmanje tri puta do isteka roka za predavanje zahtjeva za verifikaciju.
- (2) Prvo objavljivanje poziva za verifikaciju bit će izvršeno u roku od 15 dana nakon stupanja na snagu ovog Zakona, a zatim svaka dva mjeseca do isteka roka za podnošenje zahtjeva za verifikaciju.
- (3) Ministar vanjskih poslova Bosne i Hercegovine će također poslati pozive za verifikaciju svim ambasadama i konzulatima Bosne i Hercegovine s instrukcijom za odgovarajuće objavljivanje u tim zemljama.

Član 10.

(Obaveze Agencija)

U postupku verifikacije računa stare devizne štednje Agencije su dužne:

- a) izvršiti verifikaciju računa stare devizne štednje u skladu s ovim Zakonom;
- b) izdati potvrdu svakom potražiocu o zaprimljenom zahtjevu za verifikaciju i dokumentaciji iz člana 12. ovog Zakona (u daljnjem tekstu: zahtjev);
- c) uspostaviti, redovno ažurirati i održavati Registar računa stare devizne štednje (u daljnjem tekstu: Registar) za svakog potražioca, uključujući podatke o stanju verificiranih računa stare devizne štednje nakon izvršenog otpisa kamate, iznosu otpisane kamate, prometu prije završetka postupka verifikacije i održavati sve bankovne informacije neophodne za izmirenje potraživanja prema ovom Zakonu;
- d) izraditi i realizirati potrebne sigurnosne postupke kojima se pruža zaštita i osigurava cjelovitost podataka koji se vode u Registru;
- e) osigurati formiranje posebne baze podataka računa stare devizne štednje prema: filijalima i organizacionim jedinicama koje su egzistirale na teritoriji entiteta i Distrikta, u kojoj se utvrđuju svi potražioc i iznosi svih potraživanja;
- f) formirati bazu podataka spornih potraživanja;
- g) izdati potvrdu o verifikaciji iz člana 6. ovog Zakona;

- h) nakon izvršene verifikacije u skladu s ovim Zakonom, verificirati deviznu štednu knjižicu odgovarajućim pečatom;
- i) redovno obavještavati entitetska ministarstva finansija i Upravu prihoda Distrikta o izvršenoj verifikaciji;
- j) formirati arhivu o izvršenoj verifikaciji računa stare devizne štednje; i
- k) obavljati druge poslove u skladu s ovim Zakonom i pojedinačno zaključenim ugovorima s entitetskim ministarstvima finansija i gradonačelnikom Distrikta.

POGLAVLJE II. POSTUPAK PODNOŠENJA ZAHTJEVA

Član 11.

(Lokacije podnošenja zahtjeva)

Potražilac je dužan lično ili preko ovlaštenog punomoćnika predati zahtjev za verifikaciju računa stare devizne štednje neposredno u bilo kojoj poslovnoj jedinici odgovarajućih agencija u mjestima filijala banaka ili najnižih operativnih jedinica banaka u entitetima ili Distriktu gdje su računi stare devizne štednje bili deponirani.

Član 12.

(Dokumentacija koja se prilaže uz zahtjev)

- (1) Za potrebe verifikacije računa stare devizne štednje, potražilac stare devizne štednje dužan je lično ili preko ovlaštenog punomoćnika podnijeti Agencijama sljedeću dokumentaciju:
 - a) zahtjev za verifikaciju računa stare devizne štednje;
 - b) originalnu deviznu štednu knjižicu potražioca ili drugu originalnu bankovnu dokumentaciju, ugovor ili karticu kojom je račun stare devizne štednje otvoren;
 - c) pravosnažno sudsko rješenje o nasljeđivanju, ako je račun stare devizne štednje stečen nasljeđivanjem;
 - d) ličnu kartu ili pasoš potražioca;
 - e) rodni list za maloljetne potražioce;
 - f) punomoć ovjerenu kod nadležnog organa u slučaju kada punomoćnik djeluje u ime potražioca;
 - g) ličnu kartu ili pasoš punomoćnika;
 - h) pravovaljan darovni ugovor ako je račun stare devizne štednje poklonjen drugom licu; i
 - i) sve ostale dokumente koji mogu pomoći verifikaciji, uključujući račune, fakture ili neke druge dokumente u kojima je evidentiran iznos ili vlasništvo nad računima stare devizne štednje.
- (2) Ako je originalna devizna štedna knjižica izgubljena ili uništena ili potražilac ne posjeduje jedan ili više dokumenata iz stava (1) ovog člana, potražilac ima pravo podnijeti zahtjev za verifikaciju i druge dokumente ili dokaze kojima će dokazati pravo na račun stare devizne štednje.
- (3) Zahtjev za verifikaciju računa stare devizne štednje podnosi se na obrascima propisanim provedbenim propisima entiteta i Distrikta.

Član 13.

(Identitet potražioca)

Zajedno sa zahtjevom za verifikaciju, Agencijama se mora dostaviti dokumentacija koja na zadovoljavajući način identifikira potražioca:

- a) U slučaju smrti korisnika računa, potraživanje po osnovu računa stare devizne štednje može se naslijediti i dokazati podnošenjem pravosnažne sudske odluke o nasljeđivanju;

- b) Ako se račun stare devizne štednje pokloni drugom licu, potraživanje se dokazuje podnošenjem pravovaljanog darovnog ugovora; i
- c) Ako ovlašteni punomoćnik djeluje u ime potražioca ili ako preuzima gotovinsku isplatu u ime potražioca, Agencijama se mora dostaviti originalna ovjerena punomoć koju Agencije zadržavaju.

POGLAVLJE III. AGENCIJSKA VERIFIKACIJA POTRAŽIVANJA

Član 14.

(Prijem zahtjeva)

- (1) Potražilac mora podnijeti zahtjev za verifikaciju računa stare devizne štednje u roku propisanom u članu 17. ovog Zakona, a uz zahtjev podnosi i svoju originalnu dokumentaciju i deviznu štednu knjižicu.
- (2) Agencije registrišu zahtjev i dodjeljuju jedinstveni identifikacijski broj za svaki zahtjev, zatim ovjeravaju zahtjev za verifikaciju, a potražiocu predaju ovjerenu kopiju zahtjeva za verifikaciju. Ovjerena kopija zahtjeva za verifikaciju predstavlja potvrdu o podnesenom zahtjevu.
- (3) Sve originalne dokumente, osim devizne štedne knjižice, i dokumentaciju iz člana 12. ovog Zakona kopiraju Agencije i vraćaju potražiocu u vrijeme podnošenja zahtjeva. Agencije mogu zadržati deviznu štednu knjižicu do završetka verifikacije. Potražilac ima pravo dostaviti ovjerenu kopiju kompletne devizne štedne knjižice Agencijama, a zadržati originalnu deviznu štednu knjižicu.
- (4) Nakon završetka postupka verifikacije, ako je potraživanje odobreno, potvrdu o verifikaciji iz člana 6. ovog Zakona izdaju Agencije, a devizna štedna knjižica ovjerava se i vraća potražiocu.

Član 15.

(Postupak verifikacije)

- (1) Nakon podnošenja zahtjeva, Agencije pravovremeno vrše provjeru ispravnosti podataka iz dokumentacije koju je dostavio potražilac u skladu s članom 12. ovog Zakona.
- (2) Agencije vrše verifikaciju pojedinačnih zahtjeva upoređujući ih koliko god je to moguće s informacijama koje su osigurale banke u skladu s članom 8. ovog Zakona. Ako se zahtjev ne može verificirati u bazi podataka, Agencije vrše verifikaciju na osnovu podnesenih dokumenata iz člana 12. ovog Zakona.
- (3) Ako Agencije utvrde da nedostaje neki od podataka, odnosno dokument na osnovu kojeg se nesumnjivo utvrđuje stvarno stanje računa stare devizne štednje, Agencija traži, u pisanoj formi, od potražioca ili ovlaštenog punomoćnika da dodatne podatke, odnosno dokumente dostavi u roku od 30 dana, ali svakako ne nakon roka za podnošenje zahtjeva za verifikaciju definiranog u članu 17. ovog Zakona.
- (4) Ako po isteku roka Agencije ne dobiju tražene podatke, odnosno dokumente, ili ako uz dobivene podatke, odnosno dokumente nije moguće utvrditi identitet potražioca ili izvršiti verifikaciju iznosa potraživanja po osnovu računa stare devizne štednje, Agencije odbijaju zahtjev za verifikaciju.
- (5) Nakon završetka postupka verifikacije svakog pojedinačnog potraživanja, Agencije su dužne u pisanoj formi obavijestiti potražioca o tome da li je zahtjev odobren ili odbijen.
- (6) Protiv odluka Agencija dopuštena je žalba potražioca Komisiji za verifikaciju računa stare devizne štednje (u daljnjem tekstu: Komisija) kao drugostepenom organu u postupku verifikacije u entitetima i Distriktu. Odluka Komisije je konačna i obavezujuća i protiv nje se ne može

izjaviti žalba, ali se može pokrenuti upravni spor pred nadležnim sudom.

- (7) Rješavajući u postupku verifikacije računa stare devizne štednje, Agencije i Komisija dužni su postupati po zakonu o upravnom postupku entiteta i Distrikta.

Član 16.

(Komisija za verifikaciju računa stare devizne štednje)

Entiteti i Distrikt uspostaviti će najmanje po jednu komisiju. Komisija ima pet članova koje imenuju entitetske vlade i Skupština Distrikta. Najmanje jedan član Komisije je iz entitetskog ministarstva finansija i Uprave prihoda Distrikta, jedan iz entitetskog ministarstva pravde i Pravnog ureda Distrikta, a ostala tri člana imenuju se prema odluci entitetskih vlada i Skupštine Distrikta. Entitetske vlade i Skupština Distrikta mogu imenovati dodatne komisije u zavisnosti od broja uložених žalbi.

Član 17.

(Rokovi)

- (1) Rok za podnošenje zahtjeva za verifikaciju računa stare devizne štednje je šest mjeseci od dana stupanja na snagu ovog Zakona, a Agencije su dužne završiti postupak verifikacije u roku od devet mjeseci od dana stupanja na snagu ovog Zakona.
- (2) Verifikacija izvršena do dana stupanja na snagu ovog Zakona prihvata se kao pravovaljana u smislu ovog Zakona.

Član 18.

(Gotovinska isplata)

- (1) Svakih 60 dana tokom postupka verifikacije, entiteti i Distrikt objavljivati će saopćenja s identifikacijskim brojem svakog pojedinačnog odobrenog zahtjeva spremnog za gotovinsku isplatu i to u službenim glasilima i dvoje dnevnih novina.
- (2) Ako je verifikacija pojedinačnih zahtjeva završena i potražilac se slaže s iznosom koji su Agencije verificirale, potražilac mora potpisati potvrdu o verifikaciji. Potražiocu se, nakon što potpiše izjavu da se odriče prava na žalbu, isplaćuje maksimalan iznos od 100 KM ili ukupan iznos potraživanja do 100 KM. Po završetku postupka verifikacije, Agencije pripremaju spisak svih verificiranih zahtjeva i iznosa.
- (3) Osim toga, svakom pojedinom potražiocu evidentiranom u Registru se, nakon podnošenja potvrde o verifikaciji, isplaćuje maksimalan iznos od 1.000 KM ili ukupan iznos potraživanja do 1.000 KM, koji uključuje i isplaćeni iznos u skladu sa stavom (2) ovog člana, i to do kraja 2007. godine, a ostatak neisplaćenih potraživanja izmiruje se putem obveznica u skladu s ovim Zakonom. Agencije, na potvrdu o verifikaciji, unose iznos izvršenog plaćanja do 1.000 KM i obračunati ostatak neisplaćenih potraživanja koji će biti izmiren putem obveznica. Potražilac mora Agencijama dostaviti podatke o nazivu svoje banke i broj bankovnog računa koje Agencije unose na potvrdu o verifikaciji i u svoje registre.
- (4) Gotovinska isplata iz st. (2) i (3) ovog člana vršit će se po postupku i na način propisan provedbenim propisima entiteta i Distrikta.
- (5) Obaveze po osnovu računa stare devizne štednje koje nikada nisu bile preračunate preračunavaju se u KM po srednjem zvaničnom kursu Centralne banke Bosne i Hercegovine (u daljnjem tekstu: Centralna banka) na dan stupanja na snagu ovog Zakona. Kao datum konverzije već preračunatih računa stare devizne štednje uzimat će se datum kada je izvršeno preračunavanje.

Član 19.

(Verificirana potraživanja)

- (1) Agencije evidentiraju iznos računa stare devizne štednje verificiran u Registru.
- (2) Svakom potražiocu Agencije izdaju potvrdu o verifikaciji.
- (3) Nakon završetka postupka verifikacije, računi stare devizne štednje, verificirani u skladu s ovim Zakonom, umanjuju se za taj dio obaveza koji se izmiruje isplatom u gotovini i evidentira u Registru i upisuje u potvrdu o verifikaciji iz stava (2) ovog člana.

Član 20.

(Sporna potraživanja)

- (1) Agencije su također dužne da održavaju registar spornih potraživanja, koji uključuje sva potraživanja koja su kao sporna upućena na komisije, kao i sve slučajeve pred sudovima. Ovaj spisak uključuje podatke o identifikaciji lica koje potražuje račune stare devizne štednje, identifikaciji informacija o računima na koji je štednja položena i iznos uloga.
- (2) Nakon donošenja konačne odluke, Komisija dostavlja kopiju svoje odluke Agencijama, nakon čega slijedi postupak po odredbama člana 18. ovog Zakona.
- (3) Kada odluka suda o spornom potraživanju postane pravosnažna i izvršna, potražilac je, uz zahtjev za verifikaciju, dostavlja Agencijama u roku od 15 dana, na izmirenje u skladu s ovim Zakonom.
- (4) Ako je postupak verifikacije završen prije nego što je sudska odluka postala izvršna, potražilac dostavlja pravosnažnu izvršnu sudska odluku entitetskom ministarstvu finansija, odnosno Upravi prihoda Distrikta na verifikaciju i izmirenje u skladu s ovim Zakonom.

DIO TREĆI - EMISIJA OBVEZNICA

Član 21.

(Uvjeti obveznica)

- (1) Obaveze koje nisu isplaćene u gotovini, u skladu s članom 18. ovog Zakona, izmiruju se putem obveznica. Obveznice će biti emitirane u elektronskoj formi, istovremeno, i to u roku od 90 dana od dana posljednje gotovinske isplate u skladu s članom 18. stav (3) ovog Zakona, a najkasnije do 31. marta 2008. godine, pod sljedećim uvjetima:
- rok dospijeca do 13 godina, a najkasnije do 31.12.2020., s tim što će se raspored po godinama dospijeca obveznica utvrditi odlukom Vijeća ministara Bosne i Hercegovine;
 - godišnja kamata 2,5%;
 - moćnost prijevremenog otkupa.
- (2) Konačan iznos obveznica za entitete i Distrikt utvrđuje se nakon završetka postupka verifikacije u skladu s ovim Zakonom.

Član 22.

(Emisija obveznica)

- (1) Potvrda o verifikaciji sadrži evidenciju iznosa obveznica koje treba da se emitiraju svakom potražiocu. Iznosi navedeni u potvrdama o verifikaciji zajedno s imenom, adresom, bankom i brojem bankovnog računa svakog potražioca, kao i bilo koja dodatna informacija koja može biti potrebna, unose se u zvanični registar vlasništva obveznica koji vodi Centralna banka. U vrijeme emitiranja obveznica, iznos obveznica odražavat će vrijednost KM valute prema EUR valuti i to po zvaničnom kursu Centralne banke na dan emitiranja. Centralna banka preko banke iz člana 6. stav (3) ovog Zakona izdaje potvrdu u papirnoj

formi koja potvrđuje vlasništvo nad obveznicom za svakog nosioca tog prava. Ova potvrda sadrži evidenciju emisije obveznica za vlasnika obveznice. Nakon toga, obveznice će biti u formi elektronskog zapisa i u potpunosti prenosive.

- (2) Agencije su dužne saradivati i učiniti Registar i samu bazu podataka dostupnim zvaničnom registru Centralne banke.

Član 23.

(Emitent obveznica)

- (1) Obveznice emitira Bosna i Hercegovina u ime entiteta i Distrikta u skladu s odredbama ovog Zakona.
- (2) Glavnica i kamata na ove obveznice direktno se isplaćuje iz dijela sredstava entiteta i Distrikta s Jedinstvenog računa Trezora Bosne i Hercegovine. Poseban escrow račun i račun za servisiranje duga po osnovu obveznica stare devizne štednje bit će otvoren u Centralnoj banci za ovu svrhu, a Ministarstvo finansija i trezora Bosne i Hercegovine će upravljati njime.
- (3) U skladu s članom 21. ovog Zakona, uplate na escrow račun i račun za servisiranje duga vršit će se na osnovu otplatnog plana koji će biti pripremljen nakon završetka postupka verifikacije i nakon finaliziranja iznosa obveznica.
- (4) Za izmirenje obaveza po osnovu računa stare devizne štednje iz stava (2) ovog člana garantira Bosna i Hercegovina u skladu sa Zakonom o zaduživanju, dugu i garancijama Bosne i Hercegovine.

DIO ČETVRTI - PRIMJENA ODREDBI

Član 24.

(Ugovor s Agencijama)

Uzajamna prava i obaveze koji proizilaze iz postupka verifikacije entitetskih ministarstava finansija i Uprave prihoda Distrikta uređuju se ugovorom s Agencijama.

Član 25.

(Dostavljanje informacija)

- (1) Agencije su dužne dostavljati informacije o iznosu računa stare devizne štednje verificiranih u skladu s ovim Zakonom entitetskim ministarstvima finansija i Upravi prihoda Distrikta.
- (2) Entitetska ministarstva finansija i Uprava prihoda Distrikta su, svako u okviru svojih ovlaštenja, dužni voditi redovnu evidenciju obaveza po osnovu računa stare devizne štednje na osnovu dobivenih informacija iz stava (1) ovog člana u svojim glavnim knjigama trezora.

Član 26.

(Provedbeni propisi)

Entitetske vlade i Skupština Distrikta, odnosno organi koje oni ovlaste donose provedbene propise o postupku verifikacije prema potrebi.

DIO PETI - PRIJELAZNE I ZAVRŠNE ODREDBE

Član 27.

(Izvršne sudske presude)

- (1) Izvršenje sudskih presuda koje imaju povjerioci za račune stare devizne štednje također podliježu verifikaciji s ciljem registriranja potraživanja, a što se dokazuje podnošenjem izvršnih sudskih presuda.
- (2) Povjerioci su dužni dostaviti navedene sudske odluke Agencijama, uz zahtjev za verifikaciju. Također se primjenjuju i odredbe ovog Zakona kojima se uređuju otpis kamata, gotovinske isplate i emisija obveznica.

Član 28.

(Sudski postupci u toku)

Sve predmete koji na dan stupanja na snagu ovog Zakona nisu riješeni pravosnažnim odlukama nadležni sud prenosi po službenoj dužnosti na verifikaciju i izmirenje u skladu s ovim Zakonom.

Član 29.

(Propisi entiteta i Distrikta)

Entiteti i Distrikt će u roku od 90 dana od dana stupanja na snagu ovog Zakona donijeti svoje propise kojima će detaljnije urediti materiju koja je predmet ovog Zakona.

Član 30.

(Stupanje na snagu i objavljivanje)

Ovaj Zakon stupa na snagu narednog dana od dana objavljivanja u "Službenom glasniku BiH".

PS BiH broj 291/06
13. aprila 2006. godine
Sarajevo

Predsjedavajući
Predstavničkog doma
Parlamentarne skupštine BiH
Martin Raguž, s. r.

Predsjedavajući
Doma naroda
Parlamentarne skupštine BiH
Mustafa Pamuk, s. r.

Na temelju članka IV.4.a) Ustava Bosne i Hercegovine, Parlamentarna Skupština Bosne i Hercegovine na 77. sjednici Zastupničkoga doma, održanoj 13. travnja 2006, i na 57. sjednici Doma naroda, održanoj 13. travnja 2006, usvojila je

ZAKON

O IZMIRENJU OBVEZA PO OSNOVI RAČUNA STARE DEVIZNE ŠTEDNJE

DIO PRVI - OPĆE ODREDBE

Članak 1.

(Predmet Zakona)

- (1) Ovim se Zakonom uređuju postupak, način i rokovi izmirenja obaveza Bosne i Hercegovine po osnovi računa stare devizne štednje deponirane u domaćim bankama na teritoriju Bosne i Hercegovine.
- (2) Za izmirenje obaveza po osnovi računa stare devizne štednje odgovorna je Bosna i Hercegovina, a sredstva osiguravaju Federacija Bosne i Hercegovine, Republika Srpska (u daljnjem tekstu: entiteti) i Brčko Distrikt Bosne i Hercegovine (u daljnjem tekstu: Distrikt).
- (3) Osiguranje sredstava, sukladno stavku (2) ovoga članka, temelji se na lokaciji svakog depozita u banci ili u njezinim podružnicama ili najnižim operativnim jedinicama koje su poslovale na teritoriju entiteta i Distrikta u kojima je deponirana devizna štednja.
- (4) Obveza vraćanja duga s deviznih računa i deviznih štednih uloga iz stavka (1) ovoga članka, zaključenih s bankama čije je sjedište bilo izvan teritorija Bosne i Hercegovine, prema Sporazumu o sukcesiji, obveza je države sljednice bivše SFRJ, na čijem se teritoriju nalazilo sjedište te banke. Bosna i Hercegovina obvezuje se da će kroz svoje međunarodne aktivnosti pomoći štedišama koji imaju štednju kod ovih banaka da ostvare svoja prava, najmanje jednako kao i štediše kod banaka čije se sjedište nalazilo na teritoriju Bosne i Hercegovine.
- (5) Izmirenju obaveza Bosne i Hercegovine, u smislu st. (1) i (2) ovoga članka, predhodi postupak verifikacije tražbina.